

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板仔在該激啊激欸¹。無人出入咁个魚市場裡肚，就單淨留等，幾葩仔²孤栖个電火，還過，幾臺仔推啊推欸³个抽風機。

魚市場外背闊闊个停車場這片，犖花犖花仔⁴停等幾臺个自用仔。還毋想睡个駛車仔人，有人帶等罐頭來餵流浪狗，也有人帶等釣槓仔來湊月光釣魚仔。魚市場該片遠遠个停車場邊脣，幾下個越夜越有元氣个後生人，載等掛有大喇叭个音響，同車後斗撒向天、三臺車仔比比企，在該咚滋咚滋⁵尋月光共下跳舞。

右手片个音樂聲撓到吾腳底癢癢，毋過，左手片騎等過个兩臺奧多拜，錫著吾个目光。偌跔等佢兜个身影，行上兩百八十公尺長个笨鯊橋，想去看啊，掛等頭燈个兩個網魚人，係愛網麼个魚仔？月光也勾頭出來咁，一浪一浪仔个水紋，在月光下看到清

清楚楚，一張魚網、兩個網魚人，落網、收網，撈起來个係一網个月光。雖然，連魚屎仔都無，毋過，佢兜還係有講有笑，偌想，佢兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，也認同吾个想法「係啊，係啊！」緊應緊大聲，偌緊聽緊生趣。毋過，同佢看真來，該「係啊，係啊！」个聲說，怕係河壩水分海浪打轉來，抑係海浪激上河壩水个聲啊！

毋多知仔，就分偌行過笨鯊橋咁。橋這片，日時頭分人箭到轂轂个自行車，這下通棚一列列仔企好、企正，在月光下恬靜。光華華个路燈下，無人上下咁，就單淨看著一隻揸等螺殼个毛蟹，對白沙堆勾頭出來又囡倒轉去，對路脣趟過來又趟倒轉去，自家在月光下搞囡人尋。偌企在路脣，看毛蟹、看流流流流个河壩水，在共樣个月光下，已像分偌看著咁，頭擺，該一大陣笨鯊入港時，客家打漁人佢兜面頂个笑容。

¹ 激啊激欸：音 gieb a gieb e`；液體來回晃動貌。

² 幾葩仔：音 gi` pa` e`；幾盞。

³ 推啊推欸：音 kog a kog e`；此為形容機器轉動的聲音和狀態。

⁴ 犖花犖花仔：音 lo fa` lo fa` e`；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

編號 2 號

【夜鷹¹】邱一帆原作

毋記得在哪時起勢，佢輒常對斷烏²，聽著天頂高「追佢啊追佢，追佢啊追佢」个聲，一聲又一聲，一直對半夜喊到天光，該刺耳吵人个叫聲，正會對吾个耳公肚消失。當多年前，佢第一擺在屋下聽著該恁精恁嘎个聲，實在當佇毋著，趔趔行出屋面前去看。該烏烏像細雞子个身影，在天頂高飛啊飛欸、迂啊迂欸³。有成時，毋知係飛到瘴地，抑係麼个，會頓腳在屋頂高，灰濛濛个烏身，「追佢啊追佢，追佢啊追佢」个聲，還係一聲喊過又一聲。

該係麼个鳥？聲哨仰會恁吵人？佢遽遽走轉屋肚去，當認真上網路項去尋資料，尋上尋下，正發現該種形投个鳥仔，名就安到夜鷹。恁起來試著當奇怪！早早在 1861 年就有人在臺南發現佢个影跡，離這下有一百五、六十年地，既經算係臺灣特有亞種个鳥仔，對山頂到平洋、對莊下到都市，一哪仔都看得著佢个身

影、聽得著佢个叫聲。做麼个偈食地四十大零歲，正第一擺在南庄聽著、注意著恁樣个鳥聲、知著恁樣个鳥名呢？佢試著自家已敗勢啊！敗勢自家無好好个認識，一直生活在自家身邊个鳥仔。

逐年新曆二月到八月，係臺灣夜鷹尋伴个繁殖期。七個月恁長个時間，逐隻鳥公就想愛尋著自家理想个對象——鳥嫲，互相培養感情，相好下一代。乜一直愛等到孵生後代，細鳥仔會飛、離開鳥公鳥嫲个保護，正算完成傳宗接代个使命。故所，在這期間，鳥公對入夜到天光，會緊喊出「追佢啊追佢，追佢啊追佢」這吵死人个聲骸，來宣示領域，嚇走其他可能个入侵者。也因為夜鷹个聲哨難聽又大聲，有當多愛恬靜驚吵个人，就恁樣分夜鷹吵到睡毋得，諱到望毋得夜鷹遽遽消失忒！

佢知夜鷹个聲哨當吵，吵到人食睡就毋得，尋伴个繁殖期間，確實影響著人个生活。毋過，夜鷹毋係無一埕好，佢對環境也有一定个平衡⁴作用。夜鷹个嘴擘到又闊又利，會用來搶食蟲仔，不管係在暗暗个天頂高抑係光光个路燈下，水蟻仔、金龜仔、草蜢仔還有當多蟲仔，就係厥个食物、厥个好味緒。因爭夜鷹个捕食習慣，多多少少也維持咧該兜蟲仔个數量，保護著生態个平衡。

¹ 夜鷹：音 ia en'；臺灣夜鷹屬於夜鷹目、夜鷹科，非保育類特有亞種，別名：南亞夜鷹、林夜鷹、疏林夜鷹、石磯仔。

² 斷烏：音 ton' vu'；入夜。

³ 迂啊迂欸：音 din' a din' e'；轉啊轉。

⁴ 平衡：音 pin' fen'；指一個物體的運動維持不變（亦即沒有加速或減速）的狀態。